

A. T. S.
DISSERTATIO PHILOSOPHICA
DE
MAGIA

QUAM
*Permissu Ampliss. ordinis Philosophici in
Regiâ ac florentissima Upsaliensi Academiâ*

SUB MODERAMINE

Celeberrimi Viri

DN. CLAUDII ARRHENII

Hist. Prof. Publici & Ordinarii, nec non
Regii Historiographi.

*Ad experiendas ingenii vires examinandam proponit
Sæ. Ræ. Mtis. Stipend.*

ANDREAS TORSELIUS
SUDERM.

*In audit. Gust. majore die Anni Dionysiani 1679,
3 Junii*

HOLMIÆ. 

Excudit **NICOLAUS WANKIÆ**
S. Reg. Maj. Typogr.

A. 5070

S.^a R.^a M.^{cis}

REGNIQUE SVECIAE SENATORI
LIVONICI EXERCITUS SUPREMO DUCI
GENERALI GUBERNATORI LIVO-
NIAE ET RIGAE

UT ET
JUDICI PROVINCIALI VERMELANDIAE
ILLUSTRISSIMO EXCELLENTISSI-
MO QVE DOMINO, DOMINO

Christer Horn /

LIBERO BARONI

DE

Äimenne /

DOMINO

DE

Wisthuns / Gammatboo / Orrilina / Efsid /
Wijf & Gidreldaal.

PATRONO SUO MAGNO.

Excellentissime Domine, Me-
cenas ac Patrone Gratosissime!

Du dubitaveram, num has studiorum meorum pri-
mitias Illustrissimo Excellentia^e Tuae nomini in-
scriberem. Varia quippe augusti muneris tui ne-
gotia, quibus Patria nostrae causa totus es districtus, nihil fe-
rè temporis ad inspiciendos hujusmodi conatus prorsus exiles
tibi, Excellentissime Domine, reliqui faciunt. Praesertim
verò tua ingenii vis, quae nihil nisi quod comè ornateque scri-
ptum est amat, non admittere videbatur, ut Illustrissimum
T.^a Excell.^{ia} nomen huic impolito Scripto praefigerem. At-
tamen incomparabilis T.^a Excell.^{ia} benignitas in Parentes
meos assatum declarata, ut & singularis in omneis Musarum

Sectatores favor unicè impulerunt, ut intrepidus hunc quaten-
cunque ingenii juvenilis foetum, summâ tamen quâ par est a-
nimisubmissione, ad pedes tuos deponere auderem. Ut igitur
Tua Illustrissima Excellentia hoc tenue exiguumque di-
ligentiæ juvenilis specimen, tanquam debita gratitudinis devo-
tique officii tesseram benigno placidoque vultu aspiciat, & fa-
voris radios in me quoque derivet, submisso oro. Numen
illud Omnipotens te, Excellentissime Domine, non modo inco-
lunitate vitæ Nestoræa beet, sed & virtutibus Heroë di-
gnis Generosissimum tuum pectus ornet, in sui nominis glori-
am, Patriæ nostræ fulcimentum, tuæque splendidissimæ fami-
liæ commodum ac decus perenne, quod ex animo voves

Illustrissimæ Tuæ Excell.^{tia}

Observantissimus Cuius

A. Torſelius



CAPUT PRIMUM.

Origo vocis Magia. Equivocatio. Synonymia. Divisio & Definitio Magia.

§. I.

EX quo tempore Persæ suos Sapientes Magos vocarunt, Magia pro illorum Sapientum Scientia & Disciplina usurpari cæpit; & quum sic vocabulum Magiæ originem ducata Magis, ideo me non temerè facturum existimo, si vocem Magi, quo ad natales suos paucis considerem, ut sic res, de qua hic agere constitui, facilius omnibus innotescat. Quippe *Origo vocis*, ut loquitur Becman in opere suo de Origine latinæ linguæ, *est index naturæ, h. e. proprietatis & finis, ad quem res ordinata est. Et nulla est Disciplina, qua non ad expediundas dubitationes aliquando ab Etymologiâ consilium petat & opem.* Pag. 113.

§. II. Magi vocem deducunt Vossius & Becmannus ab Ebræo מַהְגִּים Mahgim, quod Sapientes, Meditabundos, in rerum cognitione occupatos denotat, à radice הָגַהּ hagah, quod est animo volvere seu meditari. Nam Magi apud priscos Persas Sapientes fuisse Viri, qui Philosophiæ studiis & mysteriis divinis toti incumbabant. Alii originem Magi quærunt a vocabulo מַגִּן quod est robur siquidem Magus alios omneis doctrina, virtute & dignitate superarrit. Nec desunt, qui Magum a Græca voce μέγας oriri putent, quum magna virtute, auctoritate & dignitate aliis præstiterit. Ita Simonem Magum variarum hæresium, parentem se μέγαν appellasse ex Actorum cap. 8. v. 9. colligitur: sed hæc verius loquendo allusio ad rem est, quam genuina vocabuli originatio. Prima proinde deri-

vatio vocis Magi ab Ebræo מַגִּי haud dubiè doctis arridebit præ reliquis, siquidem appositissima esse deprehenditur.

§. III. Non uno eodemque modo vocabulum Magiæ apud scriptores usurpatum legitur. Quippe quidam per hanc vocem intelligunt **Naturalem** illam Magiam, quæ nihil aliud est, quam accuratior in hac mortalitate rerum divinarum & humanarum notitia. Hanc Magiam, sive exquisitiorem rerum divinarum & humanarum cognitionem, puta qualem Homo post lapsum consequi potest, bona ex parte habebant Veteres Philosophi, Pythagoras, Socrates, Plato, Empedocles, septem Sapientes Græciæ, alique plurimi, quam sibi indefatigabili studio, multis peregrinationibus, ac experientia longa, quæ rerum Magistra ab erudito orbe dicitur, compararunt. Persarum quoque Magi hac excelluerunt, qui Sapientiæ studiis, & rerum divinarum ac humanarum notitia cæteris Persis ornamento erant, ut apud Gallos Druidæ, Bardi & Semnothei, apud Indos Gymnosophistæ & Brachmanæ, apud Ægyptios Sacerdotes, apud Italos Hetrusci Haruspices, apud Siculos Galeotæ, apud Babylonios & Assyrios Chaldæi, apud Cabalistas Prophetæ, apud Latinos Sapientes. Hi Persarum Magi, teste Brissonio in egregio tractatu de Regio Persarum Principatu, sua disciplina Persarum Reges, antequam ad fastigium Regum ascendere possent, imbuebant: Regibus postmodum a consiliis fuere, quorum nutu ac svasu non tantum privatas suas, verum etiam publicas res gerere debebant: publica ac privata Sacra administrabant: de prodigiis ac ostentis a plebe consulebantur; futura prædixere; illorum consiliis & vaticiniis cuncta negotia gerebantur, & proinde in auctoritate & honore apud Persas fuisse, rectissime statuunt Scriptores. Imo hac Magia ornatos fuisse Moysen, Josephum, Salomonem & tres Magos, qui ex Oriente ductu stellæ mirabilis, Christum recens natum, adorandi suæque dona ei offerendi causa advenerant, Auctores, quorum scripta vidi, asserere non dubitant.

§. IV. Alii denique Scriptores Magiæ vocem ad **Dæmoniacam** artem restringunt, quæ auxilio Dæmonis a Superstitionis Hominibus perfici creditur. Hac Magia (cujus ars Christianis invisa est, sed non statim nomen eliminandum) instructi fuere
forſan

7

Abbas Magus videns, promittit Caesari, se in medium producurum defunctam, se ejus Majestati ita placeret, ut ejus consuetudine frueretur. Annuit Imperator, itur in conclave quoddam remotus, adjunctis tercio. Magus, ne quis verbum praesente spectro proferret interdicit. Ingreditur spectrum pedetentim, Imperator miratus omnium membrorum convenientiam, recordatur verruca in cervice conjugis, sed & ea quoq; observanti apparuit. Horrui tandem Imperator, & spectrum removeri nutu Mago mandat, & cum indignatione ait: Monache, talibus in posterum abstinere jubeo, addens etiam quam difficulter linguam cohibuerit & vocem compresserit, quae si erupisset, de vita tanti Imperatoris actum fuisset. Idem hic Trithemius, Maximiliano praedicto Alexandrum M. & Julium Caesarem evocatos ostendit, ut Imperator eorum staturam, usitatas vestes, arma & lineamenta oris cognosceret. Haec autem Magiae species, praeter id quod omnes pii eam detestantur, non absq; summo periculo peragi creditur. Quippe Dæmon in assumpta mortui forma surgens (defuncti enim a Magis excitari nequeunt, ut infra dicetur) haud raro Magum vel Incantatricem statim ex hac vita subducit, ut vestigia ejus amplius non exstent. Accedit & hoc, quod is, qui ex nimia anxietate noscere avet res occultas aut futuras, vel videre solum staturam mortuorum, sana ratione privetur.

§. IV. Quum metuerent homines intempesta nocte adire sepulchra, & facere ut manes seu umbræ defunctorum surgerent, ex quibus occultas aut futuras res resciscerent, ideo Dæmon, qui nihil inexpertum omittit, quod ad propagandum Regnum suum conducit, aliam fraudem excogitare promptus fuit: introduxit enim *θεομανίας*, qua vaticinantes furore correpti, Diaboli (quem Deum multi olim putarunt) inspiratione, futura praedixere. Quidam putant hac Magiae specie olim inclaruisse Sibyllas Prophetissas, quæ multa vaticinia etiam de Christi adventu, nativitate & persona, de Deo Unitrino & similibus fidei Christianæ capitibus edidisse, vulgo credebantur. Quin & libros octo conscripsisse putantur etiamnum superstites, quos supposititios esse rectè judicat magnus ille Casaubonus atque alii Eru- diti. Sibyllis hisce non incommode accenseri dixeris Pythias virgines, quæ fuerunt Sacerdotes Apollinis, praefectæ Oraculo ejus Delphis quondam celebratissimo. Quippe sicut Dæmon Sibyllas aliosq; vaticinantes homines in furorem agebat, antequam vaticinarentur, sic etiam has Phæbades occupavit: nam quando in specu Apollinis recitandis

recitandis carminibus vacabant, atque in ead em specu somnum capiebant, Diabolus corpus illarum ingressus eò ipsas adegit, ut de rebus quæsitis sequenti luce darent responsa, quæ plerumque amphibola fuere. Vid. Del-rio Disq. Mag. lib. 4. cap. 2. Q. 3. Sect. 2. Godelm. de Mag. lib. 1. cap. 4.

§. V. Cristallomantia est Ars Dæmoniaca, qua Magi in cristallis a Diabolo obsessis quæsitæ res per figuras & imagines repræsentatas cernunt. De hac ita Del-rio disq. Mag. lib. 4. cap. 2. pag. 603. *Quendam Norimbergæ Anno 1530. ferunt in cristallo vidisse thesauros a Damone ostentatos; quos cum postea quodam ante urbem loco effosso quæreret, adhibito familiari uno spectatore, & jam in specu arcam vidissent, atque ad eam cubantem nigrum canem, Magus specum ingreditur arcam aperturus, canemque abacturus, sed Cerberi offam secum non attulerat. Itaque ille culmen spelunca quassavit, & miserum ruina obruit, qua & specus terra oppleta fuit. Hoc diabolicæ artis fuit præmium, quod miserum ac avidum illum hominem mansit.*

§. VI. Cristallomantiæ non usque adeo dissimilis est **Catoptromantia**, quæ in speculis expolitis quæsitarum rerum species per Dæmonem ostensas Mago sistit.

§. VII. Da&ylomantia, est quæ ex annulis juxta certas Cœli posituras factis, & ab Archimago obsessis, arcana cognoscere docet. Gygem ferunt habuisse talem anulum, per quem cognoscere potuit, Regnum Candaulis ad se transiturum, modo ipsum ad mandatum conjugis ejus prius obtruncasset. Quomodo Gyges hunc accepit anulum vid. Plato lib. 2. de Republ.

§. VIII. Gastromantiam quod attinet, sicco pede præterire non libuit, quam si Godelmanno credimus, hoc pacto veteres, quibus in usu fuit, peregrisse putabantur. Verba Godelmanni lib. 1. cap. 5. hæc sunt. Statuebantur vasa vitrea rotunda aquis conferta limpidissimis, & circumcollocabantur accensi cerei, cumq; evocatio Dæmonis occulto murmure absoluta, & quæstio recitata esset, adhibebatur puer impellutus, aut mulier prægnans, quæ vitra accuratè diligenterque intueretur ac circumspiceret, rogansq; impetraret responsa: ea tandem imaginibus, quæ per tersam politamque speculorum superficiem, ex aquis, quadam διαχλάσει refulgebant, Diabolus exprimebat. Sed alii aliter hanc speciem describunt.

§. IX. Lecanomania priori speciei valde affinis hoc pacto expediebatur: Superstitiosi homines in pelvim aqua repletam injiciebant aureas vel argenteas laminas, vel etiam lapillos pretiosos, certis signatos notis seu figuris: & prolatis solitis verbis, per quæ Diabolus accersebatur, proposuerunt quæstionem: tum primum quidem sonum exilem absque ulla voce percipere poterunt (hoc fuit enim signum Diaboli ingredientis in aquam) dein vocem tenuem audiebant, qua voce ad interrogata respondit Dæmon. Hanc Magiæ speciem Chaldæis, Ægyptiis & Assyriis in deliciis fuisse auctor est Godelm. de Mag. lib. 1. cap. 5. pag. 45.

§. X. Succedit jam Hydromantia, quæ præcipuè hoc modo peragi censebatur. Cyatho aqua referto annulum filo illigatum ex digito in aquam projiciebant, & sic pronunciatis certis verbis quæsitæ rei declarationem vel confirmationem postularunt: si verum fuit quod proponebatur, statim annulus sua sponte constitutis ictibus scyphum percussit. Ad eundem modum quidam in patria nostra superstitiosi homines, in commissi furti detectionem, hanc adhibent superstitionem. Aqua implere solent ingens vas, quod diligenter inspicere tenetur Magus: si jam quocunque nominato species ejus in aquis a Dæmone ostenditur, tum illum furti reum peragunt. Verum enim verò sæpe tales superstitiosi homines furti notam etiam a culpa vacuis inurunt, quippe cum Diabolus ipse verum ignorat, haud difficulter eos decipit: & si vel maximè verum sciret, tamen sæpe numero ingentem capit voluptatem, ubi homines innoxios exitio devovent Magi. Historiolam a Godelmanno de Mag. lib. 1. cap. 5. de quodam innocente suspenso traditam adscribere placuit. *Novi quendam, inquit, cum ab Ariolo indicatus, quasi gemmam pretiosam in adibus cujusdam fuisset paratus, suspensus fuit: & post dies non ita multos, gemmam amissam ancilla in cubiculo invenerunt.*

§. XI. Exponenda jam venit Colscinomania quæ a veteribus sic usurpata legitur. Forfici imponebatur cribrum, & dein forficem duobus tantum digitis contrectarunt & elevarunt, & prolatis certis verbis recensebant nomina furti aut alterius occulti facinoris suspectorum: illum verò furti aut alterius sceleris reum arguunt, si cribrum enumerato eo vel convertitur, vel ad minimum

movetur. Recentiores eundem ferè ritum in hoc divinandi modo observant, nisi quod in cribrum quoque imponant pectinem, librum Psalmorum & annulum argenteum. Fraudem autem sæpissime subesse huic divinandi speciei deprehendi facile potest, siquidem is qui binis digitis tenet forficem, pro lubitu suo cribrum ad se movendum compellere potest. Similis Coscinomantiæ est **Axinomantia** quam ita perficiunt. Rotundo palo infigunt securim, & dein ordine recensent nomina eorum, quos furti vel alterius mali facinoris suspectos habent: & quocunque appellato securis movetur eum criminis reum esse, pro certo credunt.

§. XII. Pyromantia, quæ aliis *πυρομαντία* nomine venit, breviter etiam delineanda erit, quam binis modis Antiquiores administrasse testis est Del-rio, cujus verba subscribere integrum mihi esse judico. *Aliquando tada pice illita accendebantur & certis characteribus signabantur, & si flamma tadarum in unum coibat, prosperrum, si lambens & divisa comparebat, infelicem, si tricuspis assurgebat, gloriosum eventum, si variè dispersa, in agro mortem, in sano morbum, si crepitans, infortunium, si subito exstincta, ingens periculum ominabantur.* Hic unus fuit modus, sequitur jam alter. *Aliquando hostiam in ignem conjiciebant, & duntaxat considerabatur flamma ignis victimarii, utrum in unam coiret pyramidem, quod prosperum; an verò divideretur, quod adversum: quis ignis color, splendor, ascensus, strepitus: an cito victimam comprehenderet, an exstingeretur, & similia.* Disq. Mag. lib. 4. cap. 2. pag. 609. Huc non incommode referas Capnomantiam, quæ fit ex fumo aræ: ex cuius fumi motu futura cognoscere credebantur Magi. De hac Capnomantia videatur Del-rio disq. Mag. lib. 4. cap. 2. pag. 610.

§. XIII. Non præter rem esse existimo, si quarundam passim muliercularum errorem prorsus crassum ac detestabilem detego. Quippe ægrotante quopiam, liquefacere solent plumbū, quod postquam liquefactum est, in frigidam aquam confestim conjiciunt: si jam ex hoc plumbo in aquam misso repræsentatur species mortui cadaveris, sperant morbo detentum non multo post imponere clausulam vitæ: si autem ex hoc plumbo formatur vivi alicujus animalis effigies, ægrotum pristinam recuperare salutem certo certius sibi persvadent. Hæc plumbi liquefactio sapit commercium, si non
expressum

expressum tamen tacitum, cum Diabolo, licet ii, qui ad vulgi opinionem abeunt, dicant esse laboriosam quandam humanam industriam.

§. XIV. Transito jam facio ad **Ornitomantiam** (hæc Augurium aliis dicitur) veteribus & præsertim antiquis Romanis receptam, quam hoc pacto solvebant. Ex volatu Alitum, majotum avium puta Aquilarum, corvorum vel similium, rerum inchoandarum successum prosperum aut infelicem prædixere Augures. Sic quum Alexander M. occupatus in obsidione urbis Gazæ sacra faceret, prætervolavit corvus, ex cujus ungvibus gleba dimissa Regis capiti incidit, & sic resoluta est, quam rem Aristander dixit urbis quidem excidium portendere, cæterum periculum fore, ne Rex eadie vulnus acciperet, ut tradit Curtius lib. 4. cap. 6. Videatur de Remi & Romuli augurio Livius lib. 1. cap. 6. Conf. Curt. lib. 4. cap. 7. n. 15. & lib. 4. cap. 15. n. 26. Præterea ex cantu vel garritu Oscinum, puta Noctuarum, Bubonum vel cornicum Romani aliique supersticiosi populi augurabantur. Sic ubi quispiam audit Noctuam edere clamores intempesta nocte, oppidò vicini cujusdam mortem præfagit. Similiter audientes gallinarum cantus nocturnos, aliquid diri imminere asserere nulli dubitant. Quin & ex pastu pullorum auspicia sumebantur. Habebant enim Augures caveis inclusos binos vel trinos pullos, quibus è caveis demissis, dum auspiciū rei gerendæ captare vellent, cibum peculiarē objecere: si pulli cibum edere nollent, res sinistrè cedere credebatur, si verò avidè cibum devorarent, ut cibi offa terram peteret (unde solistimum tripudium dicitur) auspiciū bonum censebatur. Vide Curt. lib. 4. cap. 8. n. 6. De hoc Augurio ita Cicero lib. 9. Epist. 28. ad Famil. *Non igitur ex alitis involatu, nec è cantu sinistro Oscinis, ut in nostra disciplina est, nec è tripudiis solistimis aut soniviis tibi auguror, &c.* Huc referas auspicia sumta ex quadrupedibus, ut ex Equorum hinnitu, de quo Tacitus lib. de moribus Germanorum. Justinus lib. 1. cap. 10.

§. XV. **Haruspicinam** multis quoque populis in deliciis fuisse, Eruditi, qui sacra sapientiæ suæ non semper reconduunt, affatim monstrant. Quippe ubi potentes Heroës, in quorum gratiam Haruspicina primariò institui solet, de rebus futuris, & non-

nunquam de bellis suscipiendis aut omittendis quid scire avert, haruspibus suis imperant, ut lecta animalia, ex quorum extis futura nunciabunt, mactent. Sic Magnus ille Alexander, ut latentium rerum eventus perspectos sibi faceret, jussit Aristandrum pecudes cedere, ex quarum extis & fibris rerum exitum declararet. Verba Curtii lib. 7. cap. 7. hæc sunt. *Itaque qui (Alexander) post Darium victum hariolos & Vates consulere desierat, rursus ad superstitionem humanarum Mentium ludibria revolutus, Aristandrum, cui credulitatem suam addixerat, explorare eventum rerum sacrificiis jussit. Mos erat haruspibus extra sine Rege spectare, & quæ portenderentur, referre.*

§. XVI. Non planè prætereundum est, quomodo Archimagus per sortes ad sui cultum homines trahat: perſuadet enim illis posse futura ope sortium prædici. Sortium autem genera tria esse, utpote **divinum, politicum & divinatorium** monumenta Scriptorum ostendunt. Duo priora sobriè adhibita licita sunt, posterius verò, siquidem diabolicum redolet artificium, prorsus abominandum & propterea illicitum censetur. Hoc ultimum sortienti genus, Astragalomantiam, Stichiomantiam & Chiromantiam supersticiosam sub se complectitur. *Astragalomania* teste Godelmano de Mag. lib. 1. cap. 9. *fit per talorum jactus, & ex numero oblato sumitur, cum de re numerata, velut de numero Maritorum, uxorum, liberorum, villarum, aliarumque rerum queritur: aut cum numerus jactus comparatur elogio. Libri enim ejusmodi elogiorum sunt omnibus de rebus & negotiis conscripti, ex quibus cuilibet assignatus est situs & situs taxillorum & numerus quomodocunque cadentium, qui cui elogio respondere deprehenditur, id vaticinium ac responsum ad questionem propositam esse demonstrant.* Hæc ille. *Stichiomantia* fit aperto libro alicujus Poëtæ insignis, & observato illo versu, qui inspicienti primum occurrit. Sic Socrates, si Del-rio verum perhibet, dicitur prædixisse diem obitus sui. Similiter quoque Claudius de posteritate sua inquirens, hunc Vergilii versum sibi primum obvium habuit lib. 1. *Æneid.*

Hic ego nec metas rerum nec tempora pono.

Chiromantia fit, quando Veratrices, potius mendaciloquæ dicendæ, quæ hominibus credulis nugas & fumos vendere sapius solent, ex lineamentis manuum nonnunquam etiam aliorum membrorum, divinant. Tales sunt nostri Lappones, qui ob exiguam stipem fa-
tenentur

13

tentur se posse, inspectis manibus alicujus, denunciare res futuras, velut illi in consilio haberent felicitarem aut infortunium alicujus. Huc spectant Genethliaci, qui non dubitant affirmare se novisse fata cujusvis, de quibus consule Godelm. de Mag. lib. 1. cap. 9.

§ XVII. Spiritus familiares, ut eos leviter tangam, sunt ipsi Dæmones, cum quibus multi mortalium ad certum præstitutum tempus foedus inivere, ut ab iis in quavis re in qua diabolicam implorant opem, adjuventur. Acquirunt autem sibi hos Spiritus familiares (ita dictos, quod vel in familia sint, vel quod familiariter cum hominibus vivant) ob animi, corporis & fortunæ bona, ut Freud. de Mag. Q. 52. pulchrè observavit. Quippe multi sibi doctrinam, fortitudinem, copiam cibi potusque absque ullo labore, magnos honores, arcanarum rerum notitiam magnasque divitias talium spirituum familiaritate perniciose compararunt. Solent verò hi spiritus sub Canis, felis, simiæ, muscæ, formicæ, araneæ, grylli vel alterius fædi animalis forma præsto esse hominibus. Nonnunquam etiam hi spiritus, teste Freudio de Mag. Q. 52. se in anulo vel alia re portabili circumferri patiuntur, quasi eo modo inclusi ab hominibus ad servitia prompti essent, quum tamen re vera sic includi nequeant.

§ XVIII. In multorum hominum domibus & villis præsentem esse solent Lares domestici, *Tämtgubbar* Svericè dicti, qui ad certum tempus hominibus officia præstare putantur. Solent enim hi Lares sibi fidei habentibus, magnam copiam frumenti (quod tamen aliis surripiunt) adportare, Equos instar fidorum adfiduorumque stabulariorum ita curare, ut nitere videantur, aliaque negotia plurima, Herculi vix tolerabilia, expedire. Hi Lares domestici, qui sic a stabulis hominibus sunt, iisque inserviant finguntur a quibusdam non nisi unum oculum enormis magnitudinis habere, eaque esse statura, qua parvi Senes gaudent, quum tamen Diabolus, ubi ipsi volupe fuerit, aliam assumere staturam & formam potis sit. Sciendum interim est homines supersticiosos solere apponere hisce Laribus Cerevisiam & cibaria opiparè apparatus, quasi illi spiritus necessum habeant suum ad tempus assumptum corpus cibo potuque refocillare; imo certas ædes aut ædium partes ipsis desi-

gnant, in quibus lectum sternunt, pavimentumque verrunt, ut dignam præstent execrabilibus hospitibus diverforium; pluris esse offendere hos Lares quam Deum stulte scelerateque putant impii; ideoque semper sordes evitabunt, ubi tales Lares commorabuntur, si vero sordes aliaque excrementa data opera projiciunt in loca, quæ his sunt vice hospitii, fieri solet ut vindictam ab eis sumant satis sævam, vel eos penitus deferant, & bona furtim eò perlata palam rursus auferant. Multi sanè habentes Lares domesticos & spiritus familiæres sanctiores videri volunt, quam ut ullum cum Dæmone habeant commercium, sed pallient rem quomodocunq; velint, si scapham dicere scapham volumus, tales utuntur ministerio Dæmonum, qui Dominis pactam haud dubiè reddent mercedem exitiabili cum fœnore.

§. XVIII. Superest ut de Magiæ speciebus longè perniciosissimis **Incantatione & Veneficio** paucis agatur. Est autem Incantamentum Dæmoniaca ars, qua Magi, sanctis Dei verbis vel impiis Diaboli vocibus prolatis, vel etiam aliis rebus & characteribus usurpatis, serpentes ut impunè tangantur, homines ut coitum non habeant, vocem hominum ne clament, arma ne noceant, molendina ne ullo impulsu circumrotentur, naves ne portu egrediantur, Canes ne latrent, aves ne volent, & id genus alia incantare arque ligare creduntur. Incantationis Exemplum Wierus de præst. Dæm. lib. 2. cap. 4. §. 14. adducit tale. *Salzburgi incantator jactabat se omnes in vicinia ad milliare serpentes posse in unam perducere foveam & interimere. Quod cum tentaret, tandem antiquus & ingens proserpit serpens, quem cum carmine in foveam compellere niteretur, ille exiliens incantatorem medium velut cingulum amplectitur, tractumque in foveam enecat.*

§. XX. **Veneficium** est actio magica, qua Magi & Sagæ (per Sagas non intelligo melancholicas, quæ frustra sibi persuadent hanc vel illam malam rem se fecisse, sed quæ re vera pessimum hoc exercent opificium) ope Diaboli & permittente Deo, adhibitis nefariis carminibus, malis imprecationibus, aliisque rebus & pharmacis in hos usus præparatis, hominum pecudumque saluti & vitæ nocent. Sic quidam Punkerus maleficus in castro **Lendenbrunnen** obsessis non parum nocuit, siquidem quamplurimos ex iis **inter-**

15

interemit, ut habet Spreng. Mall. Malef. part. 2. pag. 368. Non vero hominibus pecudibusque solum, sed etiam aliis rebus in usum hominum conditis damnum inferre solent Venefici, ut infra demonstrabitur. Plures Magiæ species, quæ minus frequenter usurpatæ fuerunt apud Veteres, recenseri possent, sed ut tempori ac instituto meo obsequar, de industria eas omitto. Si quis eas cognoscere velit adeat, Del-rio disq. Mag. Wierumde præst. Dæm. Bodinum de Dæmonomania, Rhemigium de Dæm. aliosque

CAPUT TERTIUM.

Auctor Magiæ principalis est Damon, Instrumentalis Homo. Primus hominum quis? Non mera vetula: sapius tñ. mulieres quam viri exercent Magiam. Permissio Dei requiritur ut quid ab his fieri queat.

Objectum Magiæ primum. Secundarium. Materia Magiæ. Nulla vis inest magicæ materiæ. Fadus. Duplex. Rumpi potest: Finis Magiæ respectu Diaboli, respectu etiam Hominis.

S. I.

Homines abusi arbitrii libertate, carnisque sequentes corrupta desideria, multa committunt peccata, quorum causa Efficiens directè dici nequit Satanas, ast ad Magiam illicitam facinus sanè execrabile & dirum ferri non potuissent facilè, nisi habuissent quempiam Magistrum instigatoremque improbum. Diabolus ergo, qui Princeps Mundi & Aëris in S. Scriptura vocatur, absque omni dubio Magiæ hujus Causa Efficiens Principalis existit. Is enim mille atibus & dolis id operam dat, ut hominum salutem temporariæ æternæque infidietur: imo, ut homines a veri Dei cultu abductos, æterni ignis supplicio ac cruciatui, cui ipse dudum adjudicatus est, tradat, summa ope nititur.

S. II. Veluti faber ferrarius malleo destitutus ferrum cudere nequit, ita etiam Damon non commodè potest in actum deducere

ducere ea quæ vult absque certo organo, juxta tritum

Non audeat stygius Pluto tentare, quod audeat

Effrenis monachus, plenaque fraudis anus.

Et hanc ob causam hominem suis fraudibus apprimè idoneum sibi libens associat, quo in Magia diabolica exercenda pro causa Instrumentali utatur. Observandum tamen est Magum non esse Instrumentum tale, quod merè passivè se habet, sicut malleus, dolabra vel securis, sed quod actu ipso voluntatem & membra sua actibus commodat sceleratissimis, ut rectè sentit Froman de fascinat lib. 3. pag. 479.

§. III. Varios variæ sortis ac status homines magica spurcitie fuisse inquinatos historiæ ac experientia nos erudiunt: de primo autem inventore hujus immanis dirique criminis Auctores abeunt in varias sententias, quas omneis conciliare fuerit perarduum, **Celebres** satis Scriptores existimant Noachi filium Chamum, ante & post Cataclysmum Magiam exercuisse, primumque ejus inventorem fuisse: Alii rursus Magiæ inventionem ad Jobethum & Tholuscobum Lamechi filios referre non ambigunt, in quam sententiam discedit Methodius apud Freudium de Mag. Q 9. n. 1. citatus. Sed quicquid sit, improbable non est Magiam diabolicam ante & post terræ inundationem viguisse: & forte a Chamo, quem Zoroastrem posterius ejus nominarunt, in ipso diluvio servata & postmodum propagata fuit, quum is nequam pariter & improbus fuerit homo.

§. IV. Bene multos ex mortalium numero Magiam exercuisse, & etiamnum hodie exercere in propatulo sanè est: verum meras vetulas esse, quas Dæmon ad magicum flagitium allieit, cum Cl. Freudio contra Wierum non injustè negari potest, siquidem multos Viros non tantum in Ecclesiastico, verum etiam in politico & Oeconomico statu constitutos Archimagi desiderio pravo morem gessisse apud Scriptores graves non ambigè legitur. Sic omneis Rom. Pontifices, qui Mares fuere (excipe tamen unam fœminam, quæ pontificatum gessit) a Sivelstro II. usque ad Gregorium VII. Magos fuisse, magni nominis Auctoribus persuasum est. Vide sis Freud. de Mag. Q 16.

§. V. Utut virorum & fœminarum ingens cohors sit, quæ se Dæmoni dedit, non tamen æquè multos Viros atque Mulie-

17

res Magiam exercuisse vel exercere non absurde credi potest. Mulieres certè ob iudicii & experientiæ defectum Dæmonum fraudibus citius adsentiuntur quam Viri, ideoq; facilius a Diabolo ad Magiam exercendam seducuntur. Unde Chrysostomus ornamentum sui seculi, quem Freudius de Mag. citat Q. 18. n. 2. dicit *mulierum proprium esse decipi*: Et post paulo ita. *Sexus mulierum incautus & mollis est. Incautus, quia non omnia, quæ videt aut audit, cum sapientia & ratione considerat: mollis autem, quia facile flectitur de malo ad bonum, vel de bono ad malum.* Hactenus ille. Præterea quando iram in alios homines concipiunt fæminæ, animoque vindictam meditantur, exardescunt vehementius ob sexus infirmitatem, quam ut iram concipere possint, quod tamen cordati Viri plerumq; facere norunt: ideo ut naturæ suæ sequiori satisfaciant, facilius Dæmonis solatium auxiliumq; acceptant quam Mares, & sic se ejus dolis oppidè exponunt. Accedit & hoc, quod mulieres novarum ac occultarum rerum avidiores sint Viris, unde facilius se a Diabolo, qui ipsas varias res edocet, ad Magiam seduci patiuntur. Et has ob causas non absurde colligi potest plures fæminas quam Viros his malis artibus deditas.

§. VI. Causa sine qua non Magiæ illicitæ haud dubiè est Permissio divina. Hac enim destituti Diabolus & Clientes ejus nihil quidquam efficere valent, teste S. Scriptura. Proinde ut operari possint, necessum est Deum concurrere ad actionem magicam, non quidem impellendo Magum Sagamve ad tale horrendum facinus, sed saltem sustentando vires eorum, ut possint huic actioni improbæ vitiosæq; incumbere. Quin & Deus permittit Sagis & Magis indulgere huic sceleri, dum non retrahit eos a tali facinore, linquens eos libertati Arbitrii & diritati impostoris, postquam sanctissimos ejus monitus præfractè jam cœperant spernere. Verum quamquam Deus permittit Spiritui malo nec non magis sic in homines aliasque creaturas grassari, nihilominus tamen permissioni suæ ut & illorum pravis desideriis & factis modum præfigit certum, & ex tali permissa re mala bonum novit finem elicere. Fusius de permissione Dei iusta sanctaque nostri agunt Theologi, in quorum fœcundam messem falcem meam immittere hic non sustineo. Huc facit Canon hic a Freudio de Mag. pag. 41. adductus. *A seipso Diabolus nocendi voluntatem habet, sed a Domino potestatem. Facit quod potest permittente Deo, quod potest non facit prohibente Deo.*

C

Objectum

§. VII. Objectum, quod satis commodè Materia circa quam dici potest, strictim referre, ratio ordinis jubet. Est autem id *πρωτον* seu primum, & *δευτερον* seu secundarium. Ad primum Magiæ Objectum refero hominem quo ad ambas sui partes Essentiales, Animam nempe & corpus. Sciendum interim est Animam, pro ut ratione entitatis suæ consideratur, non esse substratam magicis actionibus, quippe quæ longè excellentior est, quam ut fascinationi sit obnoxia; sed ratione facultatum suarum, Intellectus scilicet & Voluntatis consideratam, haud rarò magicarum actionum vim experiri, quod fit cum Intellectus errori obnoxius iudicat rem ita se habere, quum tñ. revera aliter sit, unde voluntas perturbatur & suo modo errat. Rectè proinde concluditur Animam non ratione Essentiæ, sed ratione officii, ut est forma hominis informans, magicis operationibus esse obnoxiam. Corpus Magiæ etiam objectum esse, vel ex hoc manifestum est, quod Magi non rarò in corpus hominis morbos atroces immittant, qua de re in sequentibus.

§. VIII. Ad secundarium Magiæ Objectum omnes ferè res usus hominum inservientes, quarum aliæ sunt Naturales, aliæ Artificiales, referendæ. Licet Dæmonis potestas circa res naturales in usum humanum conditas satis ampla sit, non tamen omnes res naturales pro suo lubitu mutare nedum corrumpere potest. Sic enim ex Voëtio Froman lib. 3. pag. m. 640. *Non potest efficere, ut tota aqua desinat esse humida, frigida, a terra separata: non potest terram loco movere. Imo non potest cælum & astra fascinare, eorūque substantiam, qualitates, motus & situs mutare, nec qua inde dependent, tempora & tempestates aliter ordinare, ut pulchrè loquitur From. lib. 3. pag. m. 639.* Et si Dæmon pro Objecto non habeat omnes res naturales, quam ergo potentiam sibi pollicentur Magiæ dediti minori gaudentes potentia quam Dæmon?

§ IX. Materia ex qua constat magica operatio, se considerandam nunc tempestivè exhibet. Constituunt autem Materiam Magiæ, solennes ritus ceremoniæ, verba, carmina, diræ incantationes, characteres, figuræ, cereæ imagines, Christi crucifixi imago, hostiæ consecratæ, panis eucharisticus, Clavi, Annuli, Amuleta
super-

superstitiosa & non naturalia, sigilla, periapta, venena Dæmonis concursu & operatione efficacia, philtrea, prælegmina unguivum, afflatus, halitus, cineres cadaverum ustorum, caro & caput mortui, funes suspensorum, manuum pedumque digiti truncato corpore adhibiti, herbæ, pulveres in cibum potumque infusi, vel nudo corpori affricati, vel vestibus adpersi, ungenta multiplicia, serpentes & bufones in pulverem redacti & sub liminibus januarum defossi, Angvillæ, muscæ, erucæ, parvi quoque infantes, & quæ id genus alia a Magis Sagisque loco materiæ adhiberi applicarique rebus conficiendis traduntur.

S. X. Vecordes Sagæ Magique venefici, nequicquam existimant se posse varios actus magicos, per has res, quæ juxta stultam ac erroneam eorum sententiam rationem materiæ habent, producere, quasi Dæmon his rebus veluti mediis addictus esset, cum aliquid in actum deducere avent Clientes ejus. Quippe impostor ille non modo variis ad hunc cultum technis & mediis a se ostensis, sed ad obtinendum istum, mediis etiam illis, quorum auctor non est, quæque nullam ad efficiendum virtutem obtinent, modo superstitiosa sint, eoque nomine a Deo aversa, adest, persuasioni hominum se accommodat, & tacitè, quasi ab iisdem mediis vires dependeant, omne operationis punctum ipse absolvit, ut Froman. de fascinat. l. 1. part. 2. p. m. 209. scitè loquitur, Proinde his rebus, quæ materiæ nomine nobis veniunt, nullam sæpe vim nullamq; efficaciam naturalem adscribi debere, cuivis perspicuum est. Certè si talis potestas his rebus insita esset, possent etiam Magiæ ignari easdem res ad tales effectus producendos usurpare. Ut autem tales effectus magicos edant Magi Sagæq;, necesse est, ut Diabolus interventu rerum longè efficaciorum, ipsis præsto sit, qui rerum naturalium peritissimus activa passivis & passiva activis applicare haud rarò solet. Unde fit, ut Magiæ dediti homines sæpenumero nullam materiam suis actionibus illicitis accommodent, sed sufficit ut consensum præbentibus ad detestandum facinus faciendum adsit ipse Dæmon, qui revera expedire solet quod molitur Magus vel Saga. Vide historiam a Fromanno de fascinat. lib. 3. pag. m. 659. adductam, ubi quædam Lamia absque interventu materiæ puerulo nocuit.

S. XI. Quemadmodum inter servum Dominumque mutua fieri consuevit obligatio & confœderatio, eo quidem con-

filio, ut Dominus perspectum sibi habeat quid Servus in ejus ministerio se expediturum promiserit, Servus verò è contrario ut sciat quid præmii commodique ex hero suo propter præstita officia reportet: ita etiam inter Magiæ deditos & ipsum Dæmonem mutuum intercedere solet pactum, ut sic quisque munia sua majori cum certitudine & cautione explere possit. Pactum proinde, quod Homo cum Dæmone facit, ita ad unguem descriptum a Godelmanno de Mag. lib. 1. cap. 2. n. 8. exstat. *Quicumque se Satana dedere vult, primum (quod dictu horrendum) Deo conditori suo renunciaret, fœdus cum eo in sacro baptismo factum rescindat, Filium Dei abneget, ejus beneficia detestetur, nomen blasphemis, convitiis & contumelia afficiat, ipsum Diabolum solum adoret, omnemque spem & fiduciam in ipsum collocet, imperata sedulò exequatur, rebus a Deo creatis non nisi ad noxam & perniciem hominum utatur: postremo fato suo functus, corpus & animam Diabolo destinet, idque alii per Damonis familiaris nomen jurejurando, alii Chirographo sanguine proprio scripto polliceri coguntur.* Hoc fuit fœdus a parte hominum, quo durante homagium semel datum præstare tenentur: si verò id homagium negligunt, quod evenit, ubi profitentes crimen in vincula conjiciuntur, tunc Diabolus, nisi Deus inhibuerit, eos prorsus miserè vexat atque excruciat. Audiamus jam pactum a parte Diaboli datum, quod ita sese habere creditur. *Dæmon multis obligationibus, quæ sapius meras imposturas redolent, promittit se suis cultoribus & mancipiis in aliqua assumta specie, quovis in loco & quovis etiam tempore absque mora adfuturum, ipsis consilia salubria, quæ non nisi ad internecionem clientum directæ sunt, suppeditaturum, in omnibus veneficii generibus auxiliaturum, ad quavis quesita responsurum, ex quibuscunque discriminibus & vinculis erepturum, pecunias variæque suppellectilis genera, cibum potumque, sine ullo eorum labore & opera daturum, imo se quavis mandata strenuè executurum.* Hoc pactum sic initum omnes pios, dum id audiunt vel legunt, terrere facillimo negotio potest, & certè debet.

§. XII. Pactum seu fœdus hoc est vel Apertum vel Occultum. Apertum fit quando quis se Dæmoni in aliqua visibili forma apparenti coram testibus, nonnunquam etiam absque iis, homagium incorruptum præstaturum jurejurando affirmat. Si verò paciscens homo Diaboli præsentiam & alloquium reformidat, tunc sufficit ad hoc expressum fœdus pangendum, si Vicarius Dæmonis h. e. Magorum quis Senior illud cum homine pactum desiderante
iciat.

iciat. Occultum pactum fit quando quis sciens & volens utitur iis
mediis quibus uti solent Magi Sagæque : imo etiam si ignorans iis-
dem mediis signisque utatur.

§. XIII. Fœdera in rebus honestis ac licitis firma rata-
que esse voluerunt Veteres pariter ac recentiores Romani : & nul-
lum dubium est, quin incorrupta haberi debeant apud omnes mor-
tales, siquidem eadem frangere, vani non tantum ingenii est, verum
quod magis est Deum ad vindictam provocat justam. Unde Vete-
res Romani, cum a sociis ruptum esset fœdus, è vestigio ad vindi-
ctam Deorum suorum provocarunt. Cœterum in rebus illicitis ac
prorsus fœdis, icta semel fœdera rescindi posse & debere, cuius ma-
nifestum est. Quis quæso tam absurdæ sententiæ est, ut statuat fœ-
dus inter duos latrones ad interimendos homines factum inviolabi-
le perpetuo esse debere ? Existimo illud optimo jure posse frangi,
si unus latronum conscientia evigilante ab hoc facinore abhorreat
& resipiscat, ut alter in malo proposito pergat. Proinde non absq̃
ratione statui potest, fœdus inter hominem & Dæmonem ictum
posse ac debere dissolvi : & quamvis id factu sit difficile, non tamen
impossibile prorsus ; Quippe ubi homo magiæ addictus sanio-
rem capit mentem, sese nimirum a Cacodæmone ad Deum converten-
do, & postmodum diabolica opera fastidiendo, fœdus inter se &
Dæmona initum, prorsus elumbe ac irritum reddere potest. Hoc
autem pactum seu fœdus nonnunquam a Diabolo, & nonnunquam
ab homine rescindi solet, licet posteriori modo sæpius rumpatur. A
Dæmone, cum is promissis non stat, & sic eos, quibus cum pactum
iniit, egregiè decipit. V. G. ubi illis loco verarum divitiarum do-
nat ossa, lapides, fimum vel alias res spurcas. Ab homine verò
dissolvitur hoc fœdus, cum pœnitentiam veram agit, Christi meri-
tum sibi firma fide attribuit, Deumq̃ conditorem suum ex toto cor-
de amplectitur. &c.

§. XIV. Finis Magiæ illicitæ, quæ vel Dæmonem vel
Magiæ deditos respicit, paucis verbis jam perstringi debet. Inten-
dit certè Diabolus per magicum exercitium id, ut Omnipotentis
Numinis Majestas, bonitas & cultus, non laudibus extollantur ab
hominibus, sed potius calumniis afficiantur : Quippe inextingui-
bile in Deum concepit odium Dæmon, ut si possit Deum de sede
sua

22
sua deturbaret; & propterea quacunq; ratione potest in id incum-
bit, ut homines ad se allectos subornet atque instiget ad varias di-
vini nominis prophanationes, vituperia & calumnias; suam autem
gloriam, quæ nulla, bonitatem, quæ semper fallax est, cultum auxi-
liumq; ubivis sic decantari posse existimat. Præterea etiam Dæ-
mon exercere jubet magicas artes, ut per eas homines innoxii, peco-
ra aliaq; res corrumpantur ac perdantur, unde Diabolus delectatur
plurimum. Imo per Magiam hanc id agit Princeps Mundi, ut ho-
minem suis laqueis irretitum participem faciat pœnarum earundem,
quas ipse, exigente id iustitia Dei, miserum in modum plenè olim
luet.

§. XV. Magiæ illicitæ finem, quatenus is ad Magiæ de-
ditos referri debet, non unum esse sed varium, jamjam constabit.
Quidam homines, ut paupertatem, qua premuntur, evitent, nomi-
na sua Diabolo dare audent: eum enim divitiis pollentem, posse
suæ inopiæ, si ipsi adhæserint, opitulari, qua inopia alias, si in Dei
timore persisterent, semper se oneratos fore existimant. Quidam ve-
rò, ut corporeas voluptates, quibus in juventute advevere, perpe-
tim usurpent, magorum se jungunt numero; quum enim bona pa-
tria in voluptates varias effuderunt, ut nullæ suppetant facultates,
quibus consuetudinem pravam h. e. voluptates alant, confestim Ma-
giam discere avent. Alii autem ut possint ulcisci injurias sibi illa-
tas, etiamsi levissimæ sint, Magi vel Sagæ fieri non dubitant. Nec
desunt qui ob honoris ac eminentiæ gradum opem implorant dia-
bolicam. Sic multos ex Pontificibus Rom. evectos fuisse ad Pon-
tificalem dignitatem auxilio Magiæ prohibitæ, etiam sectæ hujus
Scriptores affirmare haudquaquam ambigunt.

CAPUT QUARTUM.

Magia Effectus Falsi.

§. I.

Innumeros propemodum & infinitè varios effectus Diaboli Or-
ganis adscribi debere, sunt non pauci qui contendunt, sed per-
peram, siquidem illorum potentiæ non est, perducere in actum
quæ-

quæcunq; voluerint. Si enim tanta esset eorum potestas circa res naturales, quantam sibi ex superbia & temeritate insigni pollicentur, nulla certè res propter illorum tyrannidem, quam in Dei opera prorsus eximia exercere desiderant, intacta incorruptaq; esset. Unde vani omnino censendi sunt, qui ipsis tribuunt talia, qualia Pamphiliæ Thessalæ attribueret Apulejus, *Matamorphos* lib. 1. p. m. 81. f. ubi ita narrat. *Saga divinipotens cælum deponere, terram suspendere, fontes durare, montes diluere, manes sublimare, sidera exstingvere, tartarum ipsum illuminare potest.* Alii autem existimant Diabolo ex pacto adhærentes parum aut nihil efficere posse, quasi Dæmon eorum Magister non multa polleret vel scientia vel potentia, quum tamen longa naturalium rerum observatione sacra mira prorsus sagacitate præditus, multa Deo permittente agere possit. In medio autem, quum ibi tutissimè eatur, versari placet, statuendo Magos Sagasque multos miros effectus permissu Dei & auxilio Diaboli posse in actum perducere, multos verò effectus esse, qui exsuperant potentiam Diaboli, quos non possint producere, juxta illud; *Quicquid Dæmon potest, id per eum ex pacto possunt Magi: nihilq; possunt Magi, quod nequeat Dæmon.* Del-rio *disq. Mag.* lib. 2. pag. 158. Et quum hi effectus falsi, quos primum examinare animus est, multi sint, ideo præcipuos adductos in compendium redigere, temporis ac instituti ratio monet.

§. II. Persuasum multis fuit Magos Sagasque posse ex una specie perfecta in aliam transformare corpora naturalia perfectè viventia, innixi fortè narrationibus illorum, qui se Lupos, Equos, feles, Canes, Asinos, Aves & Sues fuisse deblaterarunt: cæterum si rem accuratius paulo perpendamus, deprehendi facile potest, hanc sententiam cum ipsa experientia & sana ratione è diametro pugnare. Impossibile namq; Dæmoni & ejus Clientibus est, posse hoc præstare, quum Essentiæ rerum juxta vires in prima creatione datas prorsus immutabiles sint. Præterea si talis Metamorphosis Substantialis statueretur, sanè Deus permetteret Dæmoni absolutum ferè in naturam dominium, & animam rationalem in brutam & irrationalem mutari pateretur, quod tamen nullo modo divina permittit clementia; servat enim naturæ formator unamquamq; speciem integram ac incorruptam, ut ipsi nihil quo ad essentiam decedat. Adscribere placet Doctissimi Viri Georgii Sabini verba, quæ in comment. super lib. 7. *Metamorph.* Ovidii, posteritati reliquit.

Cereos homines effici quotannis Lupos, & rursus ad pristinum habitum redire, vulgo persuasum est. Tales refert Herodotus esse apud Neurios Scythia populos. Et hic quoque apud Borussos fama est tales inveniri, & quibus nuper manus fuit captus, & ad Ducem Borussiae adductus a rusticis, quorum iumenta dilaniasse credebatur. Erat homo deformis nec multum absimilis fera, habebatque vulnera in facie, quae dicebatur accepisse morsus a canibus, ubi fuisset mutatus in Lupum. Is a quibusdam, quibus Princeps id negotii dederat, interrogatus aiebat, se quotannis bis ita mutari solitum: primum circa natalem Christi, deinde circa Festum Johannis Baptista, illisque temporibus se efferari, & cogi impetu quodam naturae in silvis inter lupos versari, maximo autem horrore & langvore corporis affici, antequam pili erumpant & forma mutetur. Hac affirmanti credita sunt: sed cum ad explorandam rei veritatem diu captus in carcere detineretur, ac diligenter a custodibus carceris observaretur, an aliquando efficeretur lupo, retinuit semper eandem formam quam habuit. Is fuit exitus fabulae. Unde constat ea, quae de ambiguis lupis narrantur esse falsa, utpote quae homines mente capti sibi imaginantur. Haecenus ille. Jam cuivis manifestum est quid sentiendum sit de nobili, quem ante exiguum tempus in canem mutatum absurdè quidam miserunt in literas: opinor typographum vel potius auctorem ejus fabulae egentem & famelicum hoc de nobili illo finxisse, ut lucellum aliquod inde venaretur. Proinde falsi sunt, qui existimant frequenter omnes illos, qui Sponsam ac Sponsam ad copulationis actum comitantur, in lupos veros transformari, quod fieri in Finlandia aliqui mentiuntur. Quippe *Essentiarum in creaturis mutatio verè & realiter fieri non potest*, observante Cl. Freudio de Mag. Q. 139. n. 48. Sunt autem tales Metamorphoses glaucomatae Diaboli, quibus hominibus credulis imponere haut raro solet,

§ III. Pro metamorphosi vera, reali & substantiali pugnare videtur mutatio Uxoris Lothi in statuam salis, nec non Nebucadnezaris in bovem. Verum, ut rem paucis absolvam, Lothi uxor divina virtute, cui nulla diabolica aut magica vis par esse potest, immutata fuit in statuam salis verè & substantialiter, quum morem gerere noller monitis divinis; non tamen anima mutationem ullam subiit, sed ea a corpore subducta ad suum receptaculum abiit, licet corpus in statuam salis mutatum sit. Nebucadnezar autem quo ad substantiam minimè fuit mutatus, nam animam rationis participem (ut intellectus obscurabatur) formamque corporis pristinam retinuit;

25

nuit: sed quo ad qualitates seu accidentia immutatus rectè ab eruditis creditur. Ex parte Animæ (non Essentiæ sed Accidentium ratione) ejus intellectus, phantasia ac voluntas ita vitiabantur, ut se verum putaret bovem, proptereaque humanam societatem fugeret & silvas peteret, ubi inter bestias viveret. Ex parte verò corporis accidentaliter tantum mutatus fuit, siquidem more boum fœno potuit pasci, quadrupes manibus pedibusque innixus frigora, calores & imbres tolerare potuit, per saltus cum cœteris bestiis discurrit, a quibus omnibus homo sanæ integræq; mentis penitus abhorret.

§. IV. Quum substantialis & quidem totalis hominis vel alterius Animalis mutatio fieri nequeat, ut evictum dedi, ideo non intempestivè quæri posset, An homo quo ad partem corporis ratione substantiæ spectati, metamorphosin admittat? Historiæ certè aliquæ latis clarè exhibent, quomodo quidam Homines unum vel alterum corporis sui membrum mutatum esse compererunt. Unam a Freudio de Mag. Q. 137. depromam historiam, quæ ex germanico Idiomate in latinum sic transferri potest. Quum Christophorus Wagnerus Patavii cum aliis nonnullis gaudio aliquando totus esset delibutus, incipit unus ex sociis ejus rogare, ut ipsis ludicram repræsenteret actionem. Wagnerus respondit hac vice sufficere, quæ ipsis hætenus ostenderat. Quum verò alter petendo insisteret, dicit Wagnerus: Age, fiet res risu digna. E vestigio alter bovinum caput cornibus inclutum accepit. Cœteri eum deridere. Hoc indignè ferens voluit eos objurgare, sed tunc ut verus taurus mugitum edidit. Statim ori cyathum admovit, ut biberet, sed id ne quicquam tentavit ob labiorum magnitudinem. Tunc Wagneri famulus vinum patera infudit, ex qua alter bibebat satis largiter. Interea fama hujus rei ad uxorem ejus est perlata, qua nunciabatur Virum habere bovinum caput. Illa properè accurrens, rem sic se habere, ut fama ferebat, comperit: multa convitia in Wagnerum ingressa, siquidem tali contumelia maritum affecerat. Wagnerus bonis usus verbis petiit, ut taceret, idem cœteri fecere, sed ne quicquam. Tunc Wagnerus applicuit uxori huic vaccinum caput cornutum, unde major exortus est risus. Uxor etiam verbis ipsum increpare cupiens cœpit mugire. Et quum viderent non redire vultus priores domum se contulere non absque spectatoribus, qui frequentes aderant: cogeantur insuper bovinis deformes capitibus lectum petere, & in lucem sequentem stertere, cum iterum a Wagnero, intercedente quopiam, priora capita humana recuperarunt. Verè & substantialiter capita horum ho-

minum in bovina non mutabantur, siquidem Wagnerus diabolicis imposturis usus id præstitit, ut viderentur bovina, quum tamen re vera mansissent humana. Quo autem modo hoc peregerit videatur Del-rio disq. Mag. lib. 2. Q. 8.

§. V. Ex planè inhabili ac inepta materia locustas, Sorices, mures, erucas, serpentes & similia animalcula Diabolus & Clientes ejus verè producere nequeunt, quum productio rerum animatarum ex inhabili materia peculiare sit opus, Deum auctorem solum agnoscens. Quando autem tales despicabiles animantes magicis artibus proveniunt, quod interdum fieri posse non inficias eo, tunc non ex inhabili sed idonea ac seminibus ejus generis foeta materia eas prodiisse certum est. Diabolus enim rerum naturæ experientissimus novit ubi apta his rebus proseminandis materia reperitur, quam juxta postulatum Clientum suorum in unum colligit, & ope naturæ applicando passiva activis credi vult vi sua Magos Sagasque produxisse talia; & sic mancipia Dæmonis impudenti ore sibi tribuunt, quod potentiæ naturali & Diaboli solertiæ atque agilitati adscribendum erit. Proinde Pharaonis Magi non produxerunt serpentes ex bacillis suis, quibus propugnendis ipsi prorsus idonei essent: De Aronis baculo virtute divina verè verso in serpentem longè aliter sentiendum est. Non veros sed apparentes hos fuisse serpentes Magorum, quidam statuunt, sed sic Moyses & Aron viri divini fascinationibus magicis delusi fuissent, quod dicere absolum videtur; certè si lusissent Magi præstigiis suis haud dubiè fraudem impostorum illico detexissent. Veros necesse est fuisse hos Magorum serpentes, quum Scriptura S. asserat Magos Ægyptios fecisse similiter, non quidem mutatis in serpentes baculis, sed alicunde allatos celerrimè subtractis bacillis omnium qui aderant objicientes obtutibus, quod quidem tam ingeniosè, solerter celeriterque ab ipsis fieri poterat, ut Ægyptii spectantes crederent baculos Magorum verè fuisse in serpentes verfos. Sed ut mentes Regis & adstantium, nisi obriguissent, divinæ virtutis magnitudo percelleret, volente Deo, serpens Moysis & Aronis serpentes Magorum penitus deglutiit.

§. VI. Suis carminibus Magi Sagæque sibi persvadent posse ex tumulis educi defunctos obsecuturos eorum cupiditati ac desideriis, sed illam opinionem a veritate remotissimam esse, sana ratio

27

ratio evincit luculenter. Qui enim in Christo piè defuncti sunt, gaudiis cœlestibus interfunt perpetim, & dein nunquam in terras has redeunt, ut humanis obversentur oculis. Impii autem mortui in locum, ex quo non dimittentur, detrusi sunt. Unde Pythoniſſa in Endor verum Samuelem magni nominis Prophetam excitare non potuit, sed re vera Dæmonem, ut Sauli daret consilium, futuraque nunciaret, evocavit. Is enim haud raro alicunde corpus solet assumere, ut præsentem se sistat iis, qui eum conventum cupiunt.

§. VII. Sunt etiam Sagæ tam vecordes, ut existiment se totas posse penetrare, & alios etiam traducere per angustas rimas & exiliora multo foramina quam sint ipsorum corpora, & hanc opinionem sparserunt passim, qui ad conventicula Sagarum sese ferri dicebant pueri puellæque, ut ex Viro fide digno accepi. Dixerunt enim se, quoties transportarentur a Lamiis, per angustas rimas in fenestris, parietibus, &c. duci ac vehi. Cœterum quam multum hi a vero aberrant, qui hoc statuunt sibi que persuadent, non satis dici potest. Quomodo enim fieri potest, ut justæ magnitudinis humanum corpus integrum illæsumque angustissimum pertransire queat foramen? Certè Diabolus *μειοτερος* præsens est, qui latenter aperit januas & fenestras, easque claudit, postquam per eas corpora transmiserat. Imo truncos & lateres in momento temporis minimo movere posse loco, & traductis corporibus ita restituere locis prioribus, ut nullum supersit mutationis vestigium, sanè argumentum est summæ agilitatis & solertiæ, quæ haud scio an spiritibus rectè queat tribui. Bonus equidem Angelus quidam portam illam magnam, per quam D. Petrum de carcere liberavit, adeo insensibiliter aperuit, ut ne quidem appositi carceri custodes & vigiles animadvertent. Act. 12. Longè tamen alia ratio fuit corporis Christi per januas seris & vestibibus occlusas venientis ad Discipulos, Joh. 20. vers. 19. ejus enim corpus glorificatum solida ac dura corpora nullo negotio potuit pervadere, itaque accessuro ad Discipulos non necesse fuit pandi januas.

§. VIII. Magi qui putant se posse impertiri animantibus ratione carentibus loquendi facultatem, verbis facillè refutantur & rationibus; nam brutæ animantes sermonis articulati per se ca-

28. paces non sunt, licet quædam præ aliis ad voces quasdam humanas proferendas promptiores natura sua videantur, ut Psittacus & Corvus. Asinam autem Bileami locutam fuisse sacra pagina Num. 22. docet, quæ tamen locutio miraculosè & divina quadam virtute peracta piè creditur. Iccirco si bestię loquuntur, ut putant Magi, id per se facere dicendæ non sunt, siquidem Dæmon illarum corpora ingredi potest, & sic per eas loqui, veluti priscis temporibus per Idola locutus est Diabolus, vel etiam ministri ejus Sacerdotes idolorum. Et quum Magi non possint efficere, ut bestię per se loquantur, facile etiam apparet eos non posse intelligendi facultatem discursivam communicare iisdem. Videatur Del-rio disq. Mag. l. 2. Q. 19. & 20.

§ IX. Per magicas artes sexus mutationem fieri posse aliqui censerent, quum Poëtæ & historiæ de naturali sexus mutatione occurrentes id svadere videantur. Cœterum si verum audire libet, Diabolus & Clientes ejus talem sexus mutationem verè & substantialiter non possunt facere, & si observetur aliqua sexus mutatio, tunc illa non est vera & realis sed apparens: potuit enim membrum ad certum tempus & quidem ob peculiare causas absconditum esse, quod dein prorupit, quò collimat Freudius dum inquit: *Verisimile est istos Homines contracto genitali membro intusque adnato in lucem editos, quod postmodum vinculis ruptis prorupit.* de Mag. Q. 143. n. 5.

§ X. Historiæ aliquæ nec non Poëtarum monumenta plurima videntur statuere senio confectis reddi posse juvenilem ætatem, quam sententiam confirmant Philosophiæ naturalis periti quidam qui censent serpentes positis exuviis novos fieri, ut ait Virgilius. Sic etiam Aquilam renovari quidam perhibent. Verum hoc Dæmonem præstare non posse, nedum ejus ministros & satellites facile quivis videt. Quo enim pacto hominibus senibus reddi potest juvenilis ætatis vigor? Existimo calidum innatum & humidum radicale semel absumta non posse cuiquam innovari, licet ea utcunque ali apud paucissimos posse ad tempus, naturæ legi non planè repugnet; quod autem Hiskia accidit, ut 15. annis adhuc vitam ageret, lethali adfectus morbo, id peculiare Dei beneficium fuit opusque. Magi proinde neutiquam præstare possunt, ut senex homo, qui decrepitam agit ætatem, vires & vigorem juvenilem resumat.

29
sumat, canities in flavos vel atros imutetur pilos, albor in calorem, langvor in agilitatem, & ut filicernium (ut uno verbo dicam) recipiat omnia, quæ per vergentem ætatem absumpta sunt. Et sanè si id facere possunt, cur non suos deformes rugososq; vultus in juveniles & formosos transformant? Cur non mutilorum membrorum loco sibi integra ac vegeta reponunt?

§. XI. Verum quidem est Sagas posse aliis hominibus lac vaccinum suffurari, quod etiam strenuus ille Hæreticorum dominator Lutherus in expositione decalogi fatetur: cæterum ut possint ex mantili, bipenni vel poste lac emulgere nullo modo statuendum erit: postis enim, bipennis & confimiles res ad lac fundendum prorsus ineptæ sunt. Diabolus autem Lamiis clam suppeditat ad butyrum & caseos inde conficiundos lac, quod ubera vicinarum vaccarum præbent, iis hoc ignorantibus & præstigias diabolicas non advertentibus.

§. XII. Non parum impudentes sunt Magi Strigesque, quum sibi indubiam & certam futurorum prædictionem polliceri audent, quasi Deus Diaboli eorumque cognitioni res liberè & contingenter futuras omnes subjecisset. Sanè Diabolus certò prædicere nequit ea, quæ omnino liberè & contingenter in his terris futura sunt. Hoc si ipse præstare nequit (licet per conjecturas probabiles de futuris nonnunquam non ineptè divinet) qua fronte certam futurorum denunciationem sibi adscribere sustinent ejus mancipia, quæ nihil possunt facere, supra id quod possit Magister eorum conficere? Solus, ut opinor, Deus cogitationes humanas noscens, potest futuras res, ut revera fient infallibiliter præscire, easque certò prædicere. Aliquando tamen fit, ut Diabolus res contingenter futuras prænunciare possit, sed tunc non ex se, sed vel ex revelatione Dei singulari, vel ex experientia rerum & temporum, vel ex temperamenti constitutione, gestibus, inclinationibus cujusque, quarum rerum sagax explorator est, hoc aut illud futurum prædicere potest, & mancipia sua prædibere paritur: imo futura ea, quæ dudum in divinis literis patefacta sunt, quæque novit se permissu Dei aliquando facturum, per se suosq; clientes prænunciare potest.

§. XIII. Negari etiam nequit, quin Dæmon cælorum

motus, conjunctiones astrorum & Ecclipses per Magos prædicere possit, quum hæc prædictio dependeat a necessariis causis, quæ ab aliis causis naturalibus non possunt impediri. Est enim Dæmon doctissimus Astronomus, qui observato cursu motuque Astrorum non potest non per Magos Ecclipses & similes futuras res naturales certò prædicere. Præsentes etiam res Diabolo apprimè notas possunt Magi Sagæque ope Diaboli nunciare: Sic Jacobus Perusinus Sacerdos pariter ac Magus, qui cum missam canens ad populum se convertisset, ut diceret, Orate pro me fratres, in hæc erupit verba, Orate pro castris Ecclesiæ, quia laborant in extremis, his verbis indicans eo temporis spacio cæsa fuisse castra, quæ Perusio ubi cecinit missam, quinque & vingiti miliaribus abfuere, ut auctor est Gril-landus lib. 2. cap. 6. de sortileg.

§. XIV. Sæpè a Diabolo decipiuntur vetulæ striges, cum autumant se frequentissimè a dæmonibus rapi ad conventus solennes diabolicos, ubi choreas ducere, edere, potare, & cum dæmonibus coire creduntur. Quippe cum se unguento (ex quo levitas ipsis accedere putatur, licet falsò) inunxere, fieri equidem potest, ut sensibus externis & internis sepultis atque perturbatis ipsis repræsentet Dæmon omnia ea quæ in conventiculis esse putantur, licet loco motæ non sint, sed in lectulis suis altiori oppressæ somno jaceant, quod etiam magni nominis Viri cupientes cognitionem certam de talibus illarum itineribus consequi, aliquando deprehenderunt. Nonnunquam tamen ad conventus tales solennes verè ferri certum est, insidentes scopis, baculis, furcis, canibus, tauris vel hircis, quæ tamen res ex unguento ita leves non fiunt, ut homines sibi insidentes ad locum designatum raptent, sed Diabolus Polytropus adest, qui scopas, baculos & consimiles res sublevat atque agit. Proinde rectè colligitur Sagas aliquando verè & corporaliter non a dæmonibus esse translatas ad conventus tales, interdum autem re vera eò deportatas esse, quod confessiones earum multiplices ac consentientes nec non argumenta rerum abunde comprobant.

Fusè hac de re differit Del-rio disq. Mag.
lib. 2. Q. 16.

CAPUT QUINTUM.

Magia Effectus Veri,
§. I.

Multi homines morbos ac cruciatus suos graves, quibus cum luctari interdum solent, non sustinent adscribere Diabolo, nedum Organis ejus, ne videantur extenuare Scripturæ dicta; Deut. 28. vers. 27. Exod. 15. vers. 26. Amos. 3. vers. 6. Deut. 7. vers. 15. 2. Sam. 24. vers. 17. 2. Paral. 21. vers. 18. Levit. 26. vers. 16. Cœterum licet Deus hominibus propter antegressa peccata, sive ut fidem illorum exploret, morbos infligat, quod & sanctè affirmari potest, nihilominus tamen Diabolus & Clientes ejus permittente Deo hominibus morbos atroces & fortè incurabiles inferre possunt, quod historia Jobi a Dæmone graviter afflicti, pariter & experientia testantur. Quin & maleficæ confiteri solent se ope Dæmonis hunc vel illum morbum immisisse cuiquam, qui vel eis vel etiam aliis injuriam intulisse creditur. Sic vetula quædam cuidam quotidie mercenariam operam locanti, ob duriora verba adversus se prolata, pustulam adeoque lepram per totum corpus acceleravit, ut fusè habet Mall. Malef. Tom. 1. part. 2. Q. 1. cap. 11. Similiter malefica quædam Sacerdoti, quod se transiens de ponte in lutum detruxit, maleficio nocuit, ut triennium vel quod excurrebat gravi detineretur morbo: hanc historiam quoq; habet Mall. Malef. Tom. 1. part. 2. Q. 1. cap. 2.

§. II. Nonnunquam etiam mortem Sagæ hominibus adferunt, ita quidem ut lenta tabe consumantur. Creduntur enim hæ maleficæ formare simulacrum cereum, ad ejus hominis effigiem, quem interimere volunt, quod igni aliquoties exponunt; & sicut hoc cereum simulacrum igni expositum sensim liquefcit & deminuitur, ita etiam vita ejus, quem occidere cupiunt, sensim deperit, donec tandem animam efflare necessum habeat. Vide historiam de Duffo apud From. de fascinat. lib. 3. part. 4. pag. 604. Interdum verò acubus illud ipsum simulacrum cereum compungere solent, & sicut illud lædunt Sagæ, ita hominem, cujus simulacrum fa-

ctum

etiam est, lædit Diabolus, licet malefica id non animadvertat: & tam diu læditur homo iste, donec contabescens moriatur. Mitius celeriusque Sicarii, Assassini dicti, homini, de quo vindictam capere volunt, mortem accelerant. Hi enim sacram crucifixi Christi imaginem sibi deligunt, in quam ut in scopum glandibus plumbeis jaculantur: telis autem trajecta imagine, putant se quemcumque enectum volunt, utut in remoto & abdito degat loco, formata tamen prius ejus imagine, telis subito posse interimere, quod etiam, permissio divina si adsit, evenit, siquidem Satanas, dum sagittarius talis imaginem hominis petit, tela in hominis corpore defigit. Tales sunt è nostris Finnis & Lapponibus ii, qui inimicos homines a se etiam aliquando remotissimos magicis telis, quæ nostris *Trällstätt* dicuntur, conficere exactè norunt, teste Olao Magno in hist. gentium septentr. lib. 3. cap. 17.

§. III. Habent & alium modum nocendi hominibus Magiæ dediti, cum injurias sibi illatas ulcisci volunt, nimirum immit- tendo ipsis malos spiritus, per diras incantationes, quas adhibere solent. Reverendus Doct. Danhaverus in tractatu suo, qui *Scheid und Abjagzbrieff* inscribitur, narrat nobilem quandam Virginem, miserum in modum Anno 1650. a Dæmone, ipsi a Vetula immisso, excruciatam fuisse, quam tragædiam ad vivum depinxit Freud. de Mag. Q. 181. n. 4. His maleficis accenseri possunt nonnulli nostri Finni, qui ubi injuriam, utut tenuem & levem acceperunt, confestim vindictæ cupidine moti, possunt hominibus (permissu tamen Dei & operatione Diaboli) venenosas quasdam res, quas *Tyrör* nuncupant, immittere, ex quibus homines, post vehementissimos dolores & cruciatus, tandem vitam finiunt.

§. IV. Sunt & Lamiae nimis crudeles, quum in prægnantium uteris infantes enecent, ita ut abortus sequatur: solent enim parvos serpentes sub liminibus januarum in pulverem redactos defodere, qui quamdiu defossi latent, tam diu infelicitatem uxores in pariundo experiuntur: interdum etiam solo afflatu ad eundem modum gravidis se posse nocere Veneficæ autumant. Possunt etiam partum foeminæ, quam oderunt, prorsus difficilem facere, licet ea pariendi difficultas ineptis mediis, ut attactu, verbis aut herbis non procuretur: Diabolus enim re vera adest, qui exaudiens desi-
deria

deria sibi famulantium, malitia sua foetum detinet loco semper eodem, viasque tenet occlusas, & varios spiritus humidos exurgere facit, ut uterus puerperae nec non foetus miserè vexentur. Rarò verò Sagæ parturientibus difficultatem pariundi adimunt, & si id præstant, tunc eò impudentiæ venit, ut aliis hominibus aliquando etiam rebus mortuis eos dolores & cruciatus, quos puerperae experientur, imponant, ut non rarò accidisse fama fert. Præterea Sagæ puerperis postquam enixæ sunt, lac omne subducunt ex uberibus, & ubera ipsa sæpè exsiccant.

§. V. Permissu Dei auxilioque Diaboli Lamiae Magique solerter norunt hominibus gravem prorsus somnum conciliare: quo dum oppressi sunt, Magi Sagæque interea sua maleficia, furta aliaque facinora perficiunt. Hic autem sopor, qui naturalis prorsus non est, sic a Magis conciliari creditur. Mortuorum pedes aut manus sibi comparant & oleo diabolico inungunt, & postmodum cum aliquod facinus machinantur, quemque manuum vel pedum digitum igni admotum incendunt: prælucentibus diris his tædis (quæ in se nullam habent soporandi vim) in domibus, omnes quotquot ante naturali detinentur somno altiori opprimuntur sopore, ut non evigilent, antequam hæ candelæ exstingvantur. Interea Sagæ sua non segniter agunt negotia, suffurantes non tantum pecunias & res alias, sed & nisi Deus prohibeat, parentibus omni cariores auro infantes teneros, quos a parentum divulsos complexibus, vel ex cunis subductos deterunt ad Orcum, relictis in subductorum locum supposititiis, quos nostrates *Bytingar* appellant.

§. VI. Somnum capientes homines a diaboli mancipiis posse invadi & vexari asseverare non erit absurdum, siquidem Dæmon homines non tantum vigiles sed & dormientes potest affligere, ut sana ratio svadet: & quum ille potis sit hoc facere, quid obstat, quo minus etiam ministri ejus permittente Deo idem præstent? Verum quidem est homines affligi in somno ab Ephialte nobis *Maara* dicto, qui Ephialtes naturalibus constat causis, & teste From. de fascin. lib. 3. part. 4. Sect. 1. cap. 5. *Est respirationis & vocis in somno interceptio, corporisq; oppressio, speciem incumben- tis thoraci oneris præ se ferens.* Cæterum præter hanc oppressionem in somno naturalem etiam datur diabolica, quæ a malis spiritibus, sed sæpius a Sa-
E
gis

gis procurari haud absurdè statuitur. Et ut res sit manifestior, placet adscribere verba Heurnii Tract. de morb. capitis cap. 30. a Fraudio de Mag. Q. 79. n. 9. adducta. Sanè qui incubo infestantur, veluti ascendere atq; insidere sentiunt suo pectori quicquam. Ego sane (pergit ille) puto duplicem causam esse: unam naturalem, alteram damonicam. Memini dum puer essem, me cubare apud Matronam quandam optimam: cum dormiret, ei super stragula Vir niger mihi incumbere visus: mane querebatur se incubo infestam fuisse. Ego quamvis puer, nihil de nigro illo audebam indicare, quod minitari, si quid protulissem, visus mihi fuisset. De Ephialte damoniacò vide exemplum apud Freud. de Mag. Q. 79. n. 30. Hinc adparet quam necessarium sit, ut ituri cubitum piis precibus divinæ nos nostrosque omnes commendemus custodiæ.

§. VII. A diabolo hoc accepere privilegium Magiæ dediti, ut eos gladii, globuli plumbei & sagittæ non penetrent: verum non totum corpus semper eis liberum ab hisce perhibent, quum ipsum caput & pars corporis infra umbilicum sæpe telorum ac gladiorum pateat ictibus. Immunes aliquando sunt a jaculis & globulis tantum ferreis ac plumbeis; si verò arma hujus generis stanæa, orichalcea, vitrea vel argentea quis adhibet, res longè aliter se habere creditur. Ut autem impenetrabilem probeque induratum cutem circumferant, jubentur a Cacodæmone periapta gestare, vel in corpore interulas linteas horrendis pictas imaginibus habere, vel etiam apud se chartas seu membranas variis inscriptas characteribus portare, vel ad minimum certa diabolica verba proferre. Hæc autem ars, Passaviensis aliquando dicta, quod ante annos circiter septem & sexaginta Passaviæ a quodam carnifice tradita sit militibus in obsidione urbis Pragensis commorantibus, non hisce mediis respectu Diaboli innixa est, sed aut Diabolus gladii aciem retundit, aut etiam globulos corporibus illorum intortos repellit, Magiæ addictis id non advertentibus, quod videtur adeo probabile. Noviquendam inquit Del-rio disq. Mag. l. 2. Q. 21. p. m. 232. Studiosum juris, nomine Quirinum U. I. Baccalaureum, qui cum tali membrana fretus audacter se jurgiis & pugnis immisceret, sæpe ictus nunquam saucius: tandem Romæ anno 1573. in symposio minimo vulnere fuit interemptus. Sic ars improbalumnum destruxit: Et sanè quotquot hanc artem usurpant (licet ad tempus ipsis munimento sit) funestum ac tragicum vitæ exitum tandem sortiuntur. Ex Freudio de Mag. Q. 133. n. 31. hæc histo-

tiola

riola sequens depromta: *Quidam Decurio ad Fellenstein captus ab hostibus, usq; ad mortem rotis cruciatus est, quum globuli ac gladii ejus cutem penetrare non possent. Post mortem verò ut horrendam spectrum longo tempore apparuit.*

§. VIII. Sibi non parum gratulantur Magiæ addicti, quum jactant se posse incolumes esse in mediis flammis ac ignibus. Sic olim Dianæ Castabalis Sacerdotes mulierculæ ab igne manserunt illæ sæ; Sic Hirpiæ in Faliscis innoxii per prunas ignis ambularunt teste Plinio hist. Nat. VII. 2. pag. m. III. v. 60. Ungi cœterum debet corpus Magorum Sagarumve certo unguento a diabolo accepto, si immunes esse velint ab ignis efficacia, licet hoc unguentum per se non habeat eam virtutem. Volunt quidam succum malvæ posse inservire huic rei, unde putant circumforaneos, habentes manus malvæ succo inunctas, impunè posse lavare manus liquido plumbo & liquefacta pice, sed de eâ dubitari potest, siquidem nemo expers Magiæ illicitæ hujus malvæ succi efficaciam experiri ausus est. Alterius tamen ordinis est, quod Sancti Dei Viri in ignis flammam conjecti salvi manserunt; Dan. 3. v. 21. seq. item quod rubus ardens non consumebatur. Exod. 3. v. 2. Superavit hoc factum naturæ vires, ideoq; tanquam singulare quid pro divino miraculo haberi debet.

§. IX. Magi Sagæq; hanc diabolicam etiam callent artem, ut possint occulto furi oculum excutere, ut notabili vultus vitio tœdatus noscendus propinetur omnibus. Exemplum sequens suppeditat Godelm. de Mag. l. 1. c. 5. p. m. 42. *Gustrovii quidam cochlear argenteum amiserat: cum autem furem ex oculo quoq; excusso cognoscere cuperet, fabrum adiit, ab eoq; petiit, ut sua arte magica furem oculo privaret, quod & factum, & statim filiulus illius, qui cochlear in angulum quendam conjecerat, oculum amisit.*

§. X. Possunt & mancipia Diaboli amorem inter quos volunt conciliare adhibendo philtrea naturalia & artificialia, verba & incantationes, signa, characteres, imagines, hostias consecratas, pilos in extrema lupi cauda, & oscillum ranæ viridis in formicarum globo exesæ, licet hæc omnia media, exceptis philtreis naturalibus, sint vana ac superstitiosa. Debet autem Dæmon, quando amorem inter tales conciliabunt Sagæ, humores turbare, semen augere, irritare,

corpus accendere, spiritus incitare, libidinis stimulos ingerere, flatus, pruritus, calorem conciliare, phantasia aliquid ut elegans appetendum amandumq; obijcere, concupiscentia motum succendere: & sic sensitivum amorem Satanas per Magos conciliare potest, ut habet Freudius de Mag. Q. 152. n. 2. Non tamen dici potest Diabolum & Magos posse in mentem & voluntatem hominum ad amorem conciliandum immediate agere, hoc enim soli Deo competit, sed mediate tantum opem naturæ & istarum rerum, quarum jam mentio facta est. Quin & odium inter certos homines etiam concordantes instruere possunt Magi, ita ut unus alterum perpeti neutiquam possit; potest enim Dæmon phantasiæ obijcere & oculis velut intuentes exponere omnes odio dignas imagines, & in memoriam revocare varios amatores, adeo ut iis animo obversantibus homines irritentur atque evomant iræ virus, etiam in eos, quos finita tali commotione animi absentes quantumvis mirè desiderent atque diligant.

§ XI. Victorias in bello nonnunquam procurare & largiri Magos Lamiasque historiae quædam & potestas eorum svadere videntur. Qippe in bellis animi & corporis vis, celeritas, dolus & impetus multum efficere possunt: & quum hæc omnia in Magiæ addictos cadant excellentiori gradu quam in homines multos alios, ideo non inconveniens ducitur, dicere eos posse permissu Dei victoriam quibus favent aliquando comparare. Sic referunt Ododorem Danicum piratam magicis artibus victoriam reportasse a Normannis, quæ historia apud Saxon. l. v. & Freud. de Mag. Q. 154 n. 4. legi potest. Nonnunquam etiam urbes expugnandas præbere possunt, imo si necessitas ita postulat, obsidione liberare: Quando verò Deus permittit Mancipiis Diaboli victorias comparare quibus favent (alias a Deo victorias provenire testatur David, Psalm. 144. v. 10.) tunc iusta judicia sua exercet, & iis qui vincuntur & profligantur, talis permissio Dei in paternam castigationem vel in pœnam debitam cedit. Sed quam execrabile, intutum & perniciosum aliquando sit horum uti opera, Del-rio disq. l. 2. Q. 12. p. 176. præter alios docuerit.

§ XII. Multi putantur magicis artibus ascendisse ad summos honores & dignitates, & quidem non absque causa: possunt enim sibi multorum hominum gratiam ac favorem conciliare, & per

& per illum evehi ad magnum dignitatis fastigium. Nam illi qui ad clavum Reipubl. sedent ita comparati sunt, ut eos qui sibi placent quantumvis indignos, ad magnos honores officia ampla promoveant. Sic Pontifices quidam Romani, quos enumerat Del-rio disq. Mag. lib. 2. Q. 12. pag. 177, Pontificalem dignitatem consecuti creduntur, licet Jesuita ibidem eos magica ope ad id munus provectos neget. Sed Magiæ deditos posse præstare, ut alii abjectæ sortis homines ad gubernacula Reipubl. vel proxima his munera assumantur, negari quam affirmari facilius potest. Divitias quod attinet, sciendum est diabolum ejusque Organa rarò largiri alicui veras divitias & pecunias, & si quas dant, ab aliis furtis sublatae haud dubiè sunt. Sæpius verò pro thesauro carbones, pro auro scorias, pro rebus bonis quisquillas, pro pane lapidem, pro pisce scorpium porrigere solent, ut inde metiri illorum liberalitatem sit facile.

§. XIII. Aerem & aquam sagæ venenis inficere quoque possunt, ita ut hinc sequantur varia morborum mortiumque genera: & hoc aliquando absque ulla difficultate præstitisse improbi homines leguntur, quibus occultum nullum cum malis spiritibus commercium. Venenis sanè infectæ aquæ tetrum pestiferumque exhalare solent odorem, imo lethiferos prorsus vapores, qui ubi in sublime feruntur, partes aëris benè multas contagio scèdant, ut morbis non tantum sed & morte subito corripiantur plurimi.

§. XIV. Deo permittente & Diabolo operam commo-
dante Sagæ Neonymphis non rarò potentiam solvendi conjugale debitum adimunt, quæ impotentia sæpius mares, scæminas vix unquam adficere putatur. Hoc mali genus, quod aliis Ligatio seu nodus ligulæ dicitur, fit in dies & annos plures paucioresve, vel in totum tempus vitæ conjugum. Ad hanc ligationem ligulæ, adhibere solent herbas, lini grana quæ copulandorum vestibis die nuptiali inserunt, serarum etiam compressiones, ligulas confectas ex linteis seu sudariis quibus involuti mortui, serpentes sub liminibus defossos, & similes res ridiculas & absurdas, quæ per se nullo modo nocent hominibus. Quomodo autem insciis Sagis diabolus debiti conjugalis solutionem impediatur, consule From. de Fascinat. lib. 3. part. 6. c. 18. pag. m. 856.

§. XV. Non dubitandum est, quin Magi Sagæque permissu Dei greges pecorum & jumentorū possint macie deformare & perimere, vel si placuerit, tumoribus & morbis adfligere, unde misere crucientur & pereant Hanc rem sic peragere creduntur : spargunt & ipsis affricant vel exhibent venenatas res , vel defodiunt sub via publica, perquam armenta pastum agi debent, vel ad stabulorum defodiunt limina serpentes aut bufones, nonnunquam etiam impense laudare solent pecudes & jumenta, quæ omnes res per se demtis venenis talem vim sibi insitam nequaquam habent. Diabolus autem, qui re vera expedit quod Magiæ dediti machinantur, res longè efficaciores adhibet in perniciem gregum, pecorum & jumentorum, licet easdem res a Dæmone adhibitas ignorent Magi atque Sagæ. Quin & frumenta aliorum & fructus aliorum traducere possunt Striges, quod Illusor Diabolus ipsis non animadvertentibus præstare facile potest. Sic Sagæ aliquando confessæ sunt se a rusticis, dum semina manderent sulcis, maximam partem filiginis & adoris surripuisse. Præterea etiam agros steriles facere possunt & quaslibet fruges fructusque perdere, quod vel incantationibus diris præstant, vel etiam pulverem noxium a Dæmone acceptum in agros conjiciunt, vel spargunt per aëra, unde proveniunt erucæ, locustæ, bruchi & hujus generis vermiculi alii, qui corrodunt & absumunt baccas, segetes, graminia & sata omnis generis.

§. XVI. Diabolum per ministros suos naturales morbos, & eos qui hominibus per magicas artes immittuntur, curare posse in confesso est. Exactissimè quippe Dæmon humani corporis novit constitutionem, discrimina viresque herbarum in tollendis morbis idoneas, qualitates item omneis rerum naturalium occultas & morbis contrarias, causas morborum abstrusas, & applicandi medicaminis modum omnium optimè novit, & sic medicinæ naturalis opè auferre potest spiritus & humores noxios, iisque sublatis ægros sanitati restituere. Superat verò ejus curandi industriâ curatio putridarum partium & sphacelismo enectarū, quas in solidum sanitati restituere nequit. Clientes ejus naturales morbos naturalibus remediis sanant, magica autem vi illatos rebus prorsus superstitionis curant, verba, aliquando res, incantationes, cereas imagines, aliaq; non minus absurda adhibendo, quæ symbola sunt rerum inanium, & sanandi nul-

lam

iam habent efficaciam. Cæterum hi superstitiosi Morborum Curatores vix solent cuiquam morbum demere, nisi eundem in alium derivent, siquidem Diaboli malitia hæc est, ut plures attaminando pluribus se Magus obstringat flagitiis. Historias hac de re vide sis apud Freud. de Mag. Q 209. Godelm. de Mag. lib. 1. cap. 8.

§. XVII. Possunt insuper Magi incantare serpentes, ut veneno quasi exuti ipsis, vel si placet aliis nullam adferant noxam, licet hæc incantatio verbis & characteribus non solum fiat, sed naturalibus etiam causis Diabolo apprimè cognitis. Incantari etiam solent canes, ut latrare nequeant, nedum aliquem mordere, & hac arte multi nocturnis furtis dediti haud dubiè utuntur. Præterea incantari possunt arma, ita ut gladii è vagina extrahi, vel extracti lædere, & bombardæ a funiculo ignito accendi, vel fortè accensæ globulos ad destinatum scopum ferre non possint. Accedit & hoc quod naves incantari queant, ut nulla vi ventorum, etiam si secundis iis, velisq; passis pellantur, portu possint egredi: pari ratione molas incantant, ut nullo impetu ventorum allapsive undarum trudentur circumganturve. Quin & superstitiosi quidam Venatores incantare dicuntur feras, ut ad unum collectæ locum omnes venabulo perimantur. Huc referuntur Sagittarii illi, qui quot volunt aves & lepores jaculis globulisq; plumbeis conficiunt. Frequentissimum etiam incantationis genus est, quo homines sic incantantur, ut muti & elingves prorsus fiant. Sic quatuor milites per fenestram ad mulierem prædivitem irrumpentes incantarunt illam ipsam, ut loqui non posset, ulliusve vicini opem poscere; interea illi nebulones 1400 thaleros ex arca abstulere, quæ historia fusius narrata est a From. de salcinat. lib. 3. part. 4. pag. m. 559.

§. XVIII. Pro colophone paucis verbis perstringam nobilem illam scituque dignam Quæstionem, An Magi Sagæq; ventos, fulgura, tonitrua, imbres, grandines & glaciem producere possint? Magiæ addicti putant equidem se posse similia meteorologica sua vi suoque molimine excitare, quasi suo conatu, lebetibus, verbis, imprecationibus, dejectionibus, characteribus & adhibitis herbis, ubi quoties & quando placeat, tantas tempestates tantosq; in simpulo fluctus ciere valeant, quibus fruges & lata omnia, nec non gramina & arbores sæpe perdant ac aboleant, sed egregiè ab

Vetera-

Veteratore ac Magistro suo illuduntur. Quippe coctione aut ebullitione ulla, ullisque carminibus aut verbis, qualiacunque illa sint, res tantas non posse confici, quivis prudens rerum pensitator deprehendere facile potest. Unde non immerito a Seneca lib. 4. Nat. Quæst. deridentur, qui solis incantationibus pluvias excitari & repelli ineprè statuunt. Interim tamen permisso Dei & auxilio Diaboli, qui Princeps aëris Eph. 2. v. 2. propterea dicitur, quod aërem turbet ac moveat, tales tempestates provocare possunt Magiæ dediti, licet eorum propria potestas & rerum quas adhibent efficacia nihil hic efficiant. Quippe Dæmon mille cuplus artifex κατ' ἐξοχήν dictus, Sagis ejus occultum influxum ignorantibus, vapores ex humo assurgentes & per aëra dispersos ad frigidam aëris regionem summa velocitate congregare & miscere optimè novit, ubi postmodum frigore condensantur, & vel in aquæ guttulas, vel in nives, vel etiam in grandines resolvuntur. Sic ubi Magi terræ motus procurare volunt, Diabolus præsto est, qui magnos efficere potest terræ hiatus, ut animalia ibi locorum errantia facile absorbeantur, licet Magi per fascinum diabolicum delusi suis ineptis mediis tales terræ motus adscribant. Item quum ventos, tonitrua, fulgera & glaciem producere cupiunt Ministri Satanæ, non longè abest ipse Dæmon, qui omnia effectui promovendo convenientia soterter ac ingenio se applicare potest. Historias de talium tempestatum excitatione habet Freudius de Mag. Q. 165.

SOLI DEO GLORIA.

